

欽定剿平粵匪方略

欽定剿平粵匪方略卷三百五十三

癸亥年

九月十一日 乙卯 廣西巡撫張凱嵩奏言據探石

逆餘黨李幅猷擁衆數萬由蜀竄黔關入湖南  
麻陽縣境近在榆市地方榆市路通洪江由武  
岡城步一帶可達廣西之龍泉廳及全州西延  
等處若由會同靖州過青林界可達懷遠臣飛  
咨代辦提督蕭榮芳偵探賊蹤相機堵剿並調

遊擊孔憲隆等扼要堵截一面檄飭地方文武  
厚集團練布置嚴防務期實力堵禦以保無虞  
奏入

上命議政王軍機大臣傳諭張凱嵩曰石逆餘黨李  
幅猷竄入湖南麻陽縣境榆市地方恐其仍循熟  
徑回竄粵省自應分路嚴防以免竄越著張凱嵩  
咨會蕭榮芳偵探賊蹤調集兵勇扼要堵截並檄

飭各該地方文武員弁厚集團練實力防堵毋稍疏虞

十九日癸亥曾國藩奏言逆匪十數萬衆竄撲青

陽縣城四面壘築圍逼八月初八日李榕督率所部由洪山口乘夜攻破袁橋賊卡礮划銜尾而上十六日派鄭陽和陳由立各將三百人進紮袁橋守城將士望見援兵出隊應之賊衆兵

單城圍仍未能解十八二十一等日喻吉三喻  
俊明江忠義席寶田水陸各軍先後進紮徐家  
村石墨鋪等處軍聲一振二十四日席寶田由  
五溪橋踰嶺攻破賊卡逆匪驚潰適彭玉麟來  
自池州周歷形勢商令江忠義率八營出董家  
村山後爲攻卡正兵喻吉三率三營出陳家村  
後爲抄襲之兵李榕率師會於董家村口爲接

應之兵並以喻俊明柳壽田水師分進夾山洪  
山兩口專攻大小賊壘爲陸師依護之兵八月  
二十七日水陸大舉江忠義親督黃仁遺等行  
近董家村從山後榛莽中擲隊緣巖而上江忠  
寬抄上巖腰斬賊無算徐德生躍過濠溝撲卡  
直入喻吉三涉水而前會合黃仁遺等擊退援  
賊移軍轉攻賊壘相持逾時堵逆突糾大股數

萬環布壘外圖抄我軍後路江忠義揮軍直前  
縱橫盪決賊遂大潰守城之軍自內擊出會合  
援軍悉埽賊巢直抵城根青陽之圍立解計平  
一百三十餘壘殲擒實逾萬人餘賊遁歸石埭  
一路查青陽一城逆賊以全力爭此要區意將  
大擾皖南掣我金陵兵勢幸託

聖主威福諸將士內守外援歷三十餘日卒能拔出

重險力保危城實屬有神大局在事尤爲出力  
員弁應先另繕清單仰懇

恩施其餘出力員弁可否容臣查明專案奏獎陣亡  
花翎都司許和山等應請

飭部從優議卹

曾國藩又奏言近日軍情大江南岸青陽解圍  
後太平石埭旌德甯國四縣尙爲賊踞劉典等



軍正擬由徽州出嶺會剿適因太平之賊竄入  
箬嶺延擾許村石門一帶雖經劉典唐義訓擊  
退而浙江富陽新復左宗棠調札劉典回浙該  
臬司去後徽州防兵單弱勢難再圖嶺外現今  
江忠義席寶田等分兵兩路進攻石埭太平等  
縣惟該數軍轉戰數月尙多嬰疾未愈朱品隆  
亦因大病過久請假回籍調理鮑超一軍已至

南陵擬先令搜剿新河莊等處圩賊由建平直達東壩其甯國守將劉松山涇縣守將易開俊自八月初九十一等日大捷後十七日賊圍甯國府劉松山力戰卻之二十二日賊至廟埠又卻之而易開俊亦於八月二十四九月初三日先後破賊於涇縣之茶坑平垣等處但求將皖南各股悉數驅除東接浙師之氣北絕金陵之

援則事機漸順矣奏入

上命議政王軍機大臣傳諭曾國藩左宗棠曰青陽雖已解圍而太平石埭旌德甯國四縣尙爲賊踞徽郡防務仍未可稍鬆左宗棠現因富陽新復札調劉典回浙惟徽郡所屬地方爲江浙兩省屏蔽設或復被竄擾則勦辦重煩兵力左宗棠現駐兵富陽距徽防稍遠但關繫浙師後路亟須妥籌兼

顧仍著左宗棠隨時策應與皖南諸軍聯絡聲勢  
迅掃妖氛毋稍大意太平石埭旌德甯國四縣城  
於何時失陷現在是否均淪於賊著曾國藩查明  
具奏江忠義席寶田各軍業經曾國藩分飭進攻  
石太等縣現今秋氣已深軍營疾病當已盡痊著  
該大臣嚴飭帶兵員弁激勵軍士鼓勇前進會同  
鮑超一軍將皖南被陷各城次第攻克期於直達

東壩會師金陵或進取廣德爲蘇浙各軍後路援  
應以收聚殲之效朱品隆因病請假回籍曾否定  
有日期該總兵平日帶兵得力一俟假期將滿卽  
令迅速來營

上諭內閣曰青陽援軍大捷立解城圍平毀賊壘一  
百三十餘座擒斬萬餘人勦辦甚屬得手著卽乘  
此聲威迅將石埭等縣踞賊趕緊掃蕩所有尤爲

出力之前署廣西提督江忠義著交部從優議敘  
浙江鹽運使李榕著賞給運司應得封典總兵朱  
品隆著以提督交軍機處記名請旨簡放布政使  
銜記名道席寶田著賞給該員兩代及本生父母  
二品封典總兵喻吉三著賞給二品封典記名提  
督黃仁遺徐德生均著遇有提督缺出儘先提奏  
並賞給一品封典副將林志金著交軍機處記名

遇有總兵缺出請旨簡放並賞給捍勇巴圖魯名  
號江忠寬著交軍機處記名遇有總兵缺出請旨  
簡放記名總兵李榮發著以總兵儘先提奏並賞  
加提督銜王順慶著以總兵記名請旨簡放並賞  
加提督銜參將鄭喬隆著交軍機處記名遇有總  
兵缺出請旨簡放副將鄭長希參將龍萬貴均著  
以總兵記名請旨簡放參將陳東和著以副將儘

先補用並賞加總兵銜卽選道陳鳴志著賞加按  
察使銜參將陳正珀曹復勝均著以總兵補用遊  
擊何明立著以副將遇缺儘先推補都司鄭長來  
著以參將遇缺儘先推補副將喻榮陞著賞給力  
勇巴圖魯名號參將宋聲平著以副將儘先補用  
副將洪得發著以總兵記名請旨簡放總兵成立  
福著賞加提督銜參將朱步青著以副將儘先補



用遊擊朱寶隆著以參將儘先補用卽補知府易  
潤壇著以道員仍歸安徽補用卽補同知直隸州  
知州梅錦源著以知府仍歸安徽補用已革延平  
協副將陳由立著開復副將原官陣亡都司許和  
山等均著交部從優議卹其餘出力員弁著准其  
擇尤保奏

同日李雲麟奏臣於本月初四日兵抵鄖西

探知鎮安賊匪東竄山陽之九里坪圖犯楚邊  
勢甚猖獗臣正擬督兵迎剿聞探得援陝川兵  
與髮逆接仗失利漢中城固相繼失守臣不能  
迅速進援致兩城次第淪陷咎無可辭相應請  
旨將臣先行

飭部嚴議至漢郡不守賊燄甚張儻該逆乘勢下竄  
興安亦岌岌可危設有不虞則楚師無進兵之

路陝南全局更難收拾現已飛飭管帶水師之  
候補知府周有全由興安駛赴石泉所屬之茶  
鎮扼要嚴守該逆自難東下並飭候補遊擊張  
殿甲率該營水師由鄖陽上駛會同防剿一面  
飛咨候補道梁作楫分凱字三營駐守興安親  
統兩營進紮茶鎮並飭兩營水師嚴行防禦俟  
臣督率舊部楚軍將鎮安賊匪擊散後卽當調

集諸軍同攻漢郡以期速復城垣奏入

上命議政王軍機大臣傳諭官文嚴樹森劉蓉李雲  
麟曰李雲麟奏稱九月初四日兵抵鄖西探聞漢  
中城固失守現已派知府周有全等分守茶鎮興  
安而自率楚軍擊鎮安股匪再圖會攻漢郡等語  
所籌均尙妥協李雲麟所請嚴議之處著加恩改  
爲交部議處該京堂卽當激勵部將將鎮安賊匪

痛加勦除毋任闖入楚境仍迅卽取道興安節節  
進勦隨時與劉蓉會商妥辦毋稍大意周有全礮  
船前經諭令留泊茶鎮該京堂復派張殿甲率該  
營水師由鄖陽上駛卽著飭令認真防勦梁作楫  
一軍前經官文等調駐鄖陽固鄂西門戶係在漢  
中等城未失之先現在漢中城固不守儻該逆乘  
勢下竄興安等處甚屬可慮李雲麟請令梁作楫

分凱字三營駐興安親統兩營紮茶鎮並調度兩  
營水師嚴行防禦著官文嚴樹森卽飭該道員力  
顧興安毋庸退紮鄖陽以資控扼如鎮安賊衆李  
雲麟兵力不敷仍著官文等妥籌調派以壯聲援  
劉蓉諒已由川入陝著懍遵前旨星速前進嚴飭  
毛震壽等繞赴西鄉防堵北面並督飭張由庚等  
力圖規復郡縣以贖前愆興安爲楚陝門戶其地

險峻易守該撫當督飭地方文武及楚省援軍極力固守以勦爲防勿使再有疏失李雲麟一軍勦辦鎮安賊匪後應由何路會勦著隨時知照辦理川中援陝之師前因統率無人號令不一致有挫敗該撫到後務申明禁令一新壁壘自能所向有功不負朝廷破格擢用之意勉之

二十日甲子惲世臨奏言髮逆李幅猷一股關入

楚境旣不獲逞志於浦市乃橫竄榆枝灣圖由  
辰谿以窺辰州水師哨官把總李曾榮禦賊陣  
亡適臣前調各營先後馳抵辰州賊偵知有備  
復由浦市竄向芷江黔陽兩縣地境勢將渡河  
東竄經官軍於江西街白土塘等處扼要堵截  
賊不得逞復分股由他處乘夜暗渡屯踞托口  
官軍分路進攻縱橫轟擊賊勢不支紛向墓坪



竄逸我軍跟追十餘里共斃賊千數百名該逆  
翻山狂竄八月十五日賊之前隊猝犯會同知  
縣鄧爾昌倉卒登陴賊蟻附登城鄧爾昌罵賊  
被害十六十七等日總兵周洪印知府戈鑑等  
軍馳至會同三面環攻旋由東門攻入立將會  
同縣城克復追殺二十餘里斃賊一千數百名  
陣斬僞軍略梁姓等二名趙福元一軍復於鳳

陽坪截殺千餘名餘賊蒼黃奔潰併竄綏甯賊甫入城各軍踵至奪門而入賊分竄長安堡青林界查該處緊接廣西融懷若該逆擾及龍勝永甯則湖南之城步新甯皆屬喫緊兼恐由興安全州灌陽以入永屬之江華永明現飭王永章由武岡拔回永州籌畫零東江永道五屬防務飭趙元福等軍從武岡新甯以至東安探明

賊蹤相機進剿飭前江蘇臬司陳士杰與永州  
各營聯絡防堵飭都司熊宗洛率水師一營駐  
永棧巡上游江面並咨會兩廣督臣將張運蘭  
等入粵之師先在郴宜樂昌一帶暫駐如果該  
逆計圖入江便可會合楚軍扼其東趨一面咨  
會廣西撫臣派兵駐紮興全聯永州防兵爲一  
氣總期節節布置使該逆進退失據惟此次逆

匪實數不下三四萬粵西地方瘠苦非賊所戀  
或竄廣東或竄江西均在意計之中臣惟有嚴  
督在事文武認真防範以期迅掃賊氛補用同  
知直隸州革職留任會同縣知縣鄧爾昌罵賊  
捐軀受害最慘應請開復革職留任處分照同  
知直隸州知州例從優

賜卹把總李曾榮請照本職從優

集賢堂之四卷三十三  
賜卹綏甯縣知縣邵承湜守備不設致被賊擾應請  
革職查辦如查有先期逃避情事再行據實叅  
奏麻陽縣知縣署黔陽縣事榮懷珍於防守事  
宜毫無布置河干所泊杉簿並不先期押令下  
駛以致賊得渡河實屬玩忽貽誤應請

旨革職永不敘用奏入

上命議政王軍機大臣傳諭惲世臨沈葆楨張凱嵩

曰逆首李幅猷率黨由浦市竄向芷江黔陽一帶  
猝陷會同縣城經官軍追至將城池攻克賊復竄  
陷綏甯官兵跟蹤追至該逆遂竄長安堡青林界  
惲世臨現飭周洪印戈鑑等扼駐靖綏以防回竄  
令陳士杰熊宗洛水陸各營防堵永州等處趙福  
元等軍由武岡新甯至東安一帶沿途探剿並留  
張運蘭等入粵之師先在郴宜樂昌暫駐以防該

逆東竄江省惟此股賊數尙不下三四萬人勢甚  
剽疾此次官軍雖於托口及會同縣城鳳陽坪等  
處斃賊各千餘名均已勢成尾追且於大股賊勢  
無損惲世臨務當分飭各軍迎頭攔剿痛加掃蕩  
毋得徒事跟追致令賊蹤任意蔓延擾及鄰省江  
西爲皖浙金陵諸軍後路東南大局最關緊要劉  
典一軍前由江西回駐徽郡現復經左宗棠調回

浙省饒九兩郡防兵勢已較單設李幅猷一股再由楚南竄入江境恐東西兩面防剿卽有兼顧不遑之勢著惲世臨嚴督在事文武實力堵剿務將此股就地殲除毋得縱令東竄並著沈葆楨選派得力將士鼓勵鄉團扼要堵截毋令賊蹤擾及邊界綏甯地接融懷兼可東趨永甯等處著張凱嵩速撥兵勇分扼龍勝永甯及興安全州灌陽等處



以防賊匪竄入並與楚軍互相絡聯務期迅掃逆氛不可稍分畛域惲世臨摺內所稱長安堡青林界究係何縣所屬地方並未聲敘明晰嗣後奏報務當將地理軍情詳細敘明

上諭內閣曰逆首李幅猷股匪竄入湖南被剿狂竄猝至會同縣蟻附入城官軍追至三面環攻立將縣城克復賊復竄陷綏甯縣城官軍跟蹤追至分

門攻入立將該縣城池攻克著惲世臨督飭各營將士嚴密兜剿就地殲除毋任旁竄會同縣知縣補用同知直隸州知州鄧爾昌罵賊捐軀被害甚慘深堪憫惻著開復革職留任處分交部照同知直隸州知州例從優議卹把總李曾榮著照本職從優議卹綏甯縣知縣邵承湜失守城池著卽革職查辦如有先期逃避情事著卽從嚴懲辦署黔

陽縣事麻陽縣知縣榮懷珍於防守事宜毫無布置河干所泊杉簞並不先期押令下駛以致賊得渡河實屬玩誤著卽革職永不敘用

二十一日

乙丑

李鴻章奏言各營規取無錫聯絡

進紮八月二十二十二等日李鶴章派令張樹聲等軍列隊芙蓉山突有賊匪七八千人來撲各軍迎前擊退連奪賊卡追至城根立將西

北兩門各賊壘一律平毀燒燬賊船十餘號二十六七等日僞侍王李侍賢等率衆四五萬人由無錫南門至坊前梅村三十餘里賊氛一片高橋大股亦分衆七八千人擾至西高山李鶴章派令各軍分路迎剿郭松林督帶馬隊衝殺東路散賊設伏誘擊賊隊大亂悉向坊前梅村敗走滕嗣武等軍由東王橋包抄夾擊擒斬千

餘人張樹珊等合擊街西股賊正追殺間該逆復出礮船數十號將抄我後張樹聲等揮隊截擊並飭參將李正珮槍船助剿將陸路之賊斬擒幾盡並奪獲礮船五六十號生擒賊目三十餘名高橋大股及北門出竄之賊亦經周盛波等擊退賊敗入城二十九日僞忠王糾合水陸賊匪十餘萬由蘇州竄出直犯大橋角官軍營

盤李鶴章督軍馳援周壽昌率親兵數千人向賊船施放槍礮燒燬賊船八隻斃賊數百名其對河悍逆復由浮橋偷渡圍逼官軍營盤吳勝清督率各軍擊斃賊屍狼藉適援軍大集勇氣百倍張樹珊率洋槍隊衝擊斃賊百餘賊猶死拒各軍分隊抄擊連拋火彈延燒該逆藥簍張士芳等揮軍直入往來馳突四面環攻該逆奪

路奔竄復被董鳳高等率劈山礮隊扼橋截擊  
斃賊數百名餘匪落河溺斃者無數南面之賊  
並經黃翼升等率洋槍隊橫擊之擊沈賊船多  
隻大橋角之圍立解其退踞黃埭及分竄緱山  
芙蓉山之賊均經官軍連日擊退擒斬甚多並  
燒燬火輪船礮船多隻訊據賊供僞祥王黃濬  
芸僞納王郅泳寬僞忠王之子均被官兵擊敗

落水淹斃查我軍進圖無錫蘇賊日見危蹙僞  
忠王李秀城僞侍王李侍賢率大股來援欲攻  
破大橋角營盤直入常熟太倉擾我後路掣我  
兵勢幸將士用命苦戰連旬轉危爲安臣仍慎  
密防備並飭李鶴章程學啟等穩紮穩進以圖  
攻取此次尤爲出力人員謹先行開列懇請獎  
勵其餘在事出力員弁可否容臣查明彙案請



獎出自逾格

天恩陣亡之都司銜守備施本仁請

飭部照都司陣亡例議卹

李鴻章又奏言程學啟一軍自攻克寶帶橋後  
卽商同李朝斌戈登扼要駐守八月十九日忠  
逆糾衆七八萬來撲程學啟督兵截擊鏖戰八  
時之久傷斃無算賊始敗退九月初二日賊由

齊婁葑三門分股出犯約四五萬衆程學啟督  
軍迎戰槍礮輪施倂賊退至護城河邊始行收  
隊嘉興大股分路入竄踞紮七里橋蔓延二十  
餘里經駐守之副將何安泰等迎擊力戰竟日  
斃賊數百總兵陳有昇馳至腹背夾擊賊始敗  
退初四五等日湖州嘉興之賊分竄吳江東南  
其由平望至同里一路賊衆亦四出焚擄李朝

三十一  
斌等督隊擊退平段賊卡數十處查蘇州城大  
池深附河堅壘攻取頗難忠逆又挾衆來援時  
欲乘虛擾我後路刻下兵力尙單似須各路得  
手賊勢稍分乃可乘機攻克奏入

上命議政王軍機大臣傳諭李鴻章曰李鴻章督飭  
各營進規無錫聯絡進紮僞忠王等各率大股來  
援計圖攻破大橋角等營盤直入常熟太倉掣動

各軍後路諸軍苦戰擊走援賊各營得以轉危爲  
安我軍將士實爲異常出力踴躍用命深堪嘉尚  
著李鴻章加意拊循傳旨嘉獎此時援賊屢敗城  
賊亦經疊創而困獸猶鬪仍應飭令李鶴章程學  
啟等穩紮穩進毋以垂成之功稍涉驕懈嘉興湖  
州逆黨各竄吳江同里平望亦經各路之軍力戰  
敗走惟蘇州城大池深賊以附河堅壘面面死守

屢欲乘虛狡逞著李鴻章飭令程學啟李朝斌等  
嚴扼要隘制其奔突仍當聯絡各路之軍相機攻  
取

上諭內閣曰官軍進攻無錫分路擊敗水陸援賊勦  
辦甚爲奮勉著李鴻章乘此聲威督飭李鶴章等  
軍速克堅城並乘勝直擣蘇垣將餘逆悉數殲除  
以靖疆圉所有此次尤爲出力之總兵王東華著

賞給正一品封典記名總兵滕嗣武黃中元均著  
賞加提督銜江蘇道員張樹聲著賞給卓勇巴圖  
魯名號副將銜周壽昌顏邦桂均著以副將儘先  
補用周壽昌並賞給莊勇巴圖魯名號參將吳勝  
清著賞給冠勇巴圖魯名號童邦喜著賞給技勇  
巴圖魯名號王平西著賞給勝勇巴圖魯名號遊  
擊董鳳高著賞給精勇巴圖魯名號都司張士芳

著賞給強勇巴圖魯名號守備楊正國著賞給翼  
勇巴圖魯名號孔慶玉童虎臣均著以遊擊補用  
並賞加副將銜汪丙炎著以都司補用並賞加遊  
擊銜其餘在事出力員弁著李鴻章查明彙案請  
獎陣亡之花翎都司銜守備施本仁著交部照都  
司陣亡例議卹

二十二日

丙寅

都興阿奏言欽奉

諭旨飭令酌設渡口濟渡難民查靖江縣之八圩六  
圩兩港緊對江陰地勢扼要稽察易周擬卽在  
該兩港口各設巡船二隻以六圩港專渡難民  
以八圩港專渡南岸水陸兵勇其餘各港口仍  
應概行封禁臣一面嚴飭該處員弁妥辦一面  
咨會李鴻章吳棠查照如有另辦章程仍隨時  
酌覈妥議務於體恤難民之中仍寓嚴防奸宄



之意至水師扼泊長江防勦最關緊要刻下南岸賊匪疊向利港劉港包港姚家橋等處竄撲雖經各軍擊退而防範不容稍鬆據吳全美稟稱以總兵郭定猷一營移紮丹徒至包港一帶參將梁正源一營派防包港以下圩塘口提督賴鎮海及副將林宜華兩營仍派原防該總兵可於三江營適中之地上下策應臣准有督飭

水師嚴密梭巡毋令賊匪偷渡奏入

上命議政王軍機大臣傳諭都興阿曰據奏酌設渡  
船濟渡難民籌辦尙屬妥協卽著飭令地方文武  
妥籌辦理毋稍疏懈至水師扼泊長江防範最關  
緊要江陰克復南岸賊匪雖屢被官軍擊退而賊  
蹤出沒無常亟宜扼要設防相機堵剿著卽督飭  
吳全美統率水師各營弁聯絡聲勢遇賊卽擊以

免滋蔓

二十八日壬申駱秉章奏言髮逆李幅猷擁衆數

萬由正安婺川一帶竄入彭水之周家寨經總  
兵李復勝等分路進剿斬馘無算疊破賊卡該  
逆出巢抗拒我軍奮勇衝突開礮轟破賊壘斃  
賊約千餘名餘賊向梅子垭敗竄官軍跟蹤追  
剿復斬馘千餘級生擒三百餘名賊乃翻山向

西陽之學堂坪兩河口竄走其前隊已突竄黔  
江之分水嶺李復勝等分兵攻擊將拒賊擊敗  
迤徧兩河口直搗賊巢賊勢不支紛紛敗走其  
竄入黔江者被官軍追殺千餘名該逆遂由綫  
壩遁入湖北之咸豐縣界旋竄黔江之沙子坪  
我軍乘勢掩殺斃賊二三千名敗賊竄往龍潭  
各軍乘勝追殺斬馘悍賊二千餘名賊奪路奔

竄秀山之容溪一帶官軍沿途追殺斬馘數百  
餘賊敗竄平塊邑梅場兵勇追殺不計其數該  
逆遂由邑梅濫橋遁入黔境現據探報餘賊由  
花園逃竄湖南麻陽一帶被楚師截爲數起該  
逆驚魂未定復被痛創殘燄諒難再張惟銅仁  
包逆尙在黔蜀邊界西秀之防旣難遽撤而援  
陝諸軍現甫失利川北雖有武字定武兩軍分

布昭廣平武等處要隘並派振武四營駐防太  
平究覺地廣兵單不能無慮臣現札飭果後軍  
暫留三營以防秀山邊界其餘九營調赴保甯  
一帶以備防剿

駱秉章又奏言援陝諸軍敗挫賊勢必張竊慮  
該逆乘我敗退窺伺川疆川北各隘之防更形  
喫重陝西撫臣劉蓉已抵保甯臣已飛咨知會

然劉蓉所帶僅有親兵其恃以進剿者卽此湘  
果等軍一萬餘人銳氣旣挫急切難圖進剿儘  
賊以全力注蜀尤難堵挂臣已調分駐涪州等  
處之果後九營馳赴保甯一路旣可助劉蓉之  
聲威並可隨時堵禦以防奔突再據總兵周達  
武馳報漢中府城已於二十一日失陷城中文  
武不知下落合併附陳奏入

上命議政王軍機大臣傳諭駱秉章勞崇光惲世臨  
劉蓉張亮基曰髮逆李幅猷被川軍擊敗遁入黔  
境餘賊自花園入湖南麻陽一帶與惲世臨前奏  
情形大略相同該逆經楚軍截剿後復被痛創殘  
餘諒難再張亟應協力進剿以圖聚殲著駱秉章  
惲世臨各飭在防官軍會合進攻兩面夾擊務將  
此股賊匪就地掃除毋令再肆蔓延李幅猷股既



遁入黔境黔省銅仁包逆現尙遊駛黔蜀邊界西  
秀一帶自應嚴密防禦所有駐防秀山三營卽著  
駱秉章飭令認真捍禦嚴加守備毋稍疏懈並著  
勞崇光張亮基迅派得力兵將將李幅猷敗竄餘  
匪分投夾擊實力殲除毋任蔓延漢南援軍新挫  
賊勢臨張川北各隘之防亦形喫重駱秉章札調  
果後九營馳赴保甯一路務須飭令派出官軍實

力防勦以固川疆劉蓉已抵保甯著卽迅速前進  
相機勦辦迅克漢中城固等城惟該撫所恃以進  
勦之軍卽此湘果等營現在銳氣已挫一時恐難  
進攻應否將派赴保甯之果後九營移紮前敵協  
同勦洗之處著駱秉章劉蓉酌度情形妥籌辦理

欽定勦平粵匪方略卷三百五十四

癸亥年

十月初三日丙子李鴻章奏言程學啟一軍攻克

寶帶橋後商同李朝斌戈登分投堵勦寶帶橋  
西有五龍橋爲蘇州入太湖之鎖鑰該處賊紮  
堅壘六座憑河死守九月十二日程學啟飭周  
良才等嚴守永安橋老營親率五營並洋槍隊  
二千人及水師陳東友成俞卿等由寶帶橋分

路進攻五龍橋逆壘戈登以開花大礮攻其左  
轟傷垛賊多名賊猶抵死不退李朝斌由左首  
小河繞出賊後用礮轟擊賊旗已亂成俞卿陳  
東友乘勢蹙之戈登帶隊緣牆而上陳忠德等  
撲入賊營之右立破大營兩座土營四座追斬  
潰賊鮮得脫者暮逆突由盤門擁衆來援經張  
遇春等擊退計是役擒賊四百餘名傷斃千餘

落水死者無算其嘉湖竄撲吳江同里之賊經  
知州吳毓芬參將何安泰等於初六初八初九  
初十等日敗於長板橋等處而百龍橋八坼一  
帶賊營密布直至平望程學啟令戈登暫駐五  
龍橋十五日自督水陸各軍從吳江分路進剿  
戈登派洋人克根木等分帶礮位出隊助剿各  
破沿途賊營十餘座進至八坼諸軍會合夾攻

生擒僞貴王陳得勝及悍賊一千餘名斬殺三千餘名共破賊營三十餘座追至平望賊匪望風奔潰訊據擒賊供稱僞會王榮王貴王帶賊三萬餘人逃出者不及一半臣查官軍進攻蘇州紮永安橋而婁門路斷紮寶帶橋而葑門路斷茲攻克五龍橋而盤門太湖之路又斷蘇逆遂勾通浙逆圖撲吳江以擾我後經程學啟與

戈登李朝斌協力迎剿幾使嘉湖援賊片甲不  
歸從此攻蘇之軍不虞牽掣臣飭程學啟調陳  
有昇梁安邦二營扼紮五龍橋張遇春二營扼  
紮寶帶橋鄭國魁二營移守同里之長生橋均  
派太湖水師分駐依護仍令程學啟戈登督帶  
槍礮隊伍四路游擊隨時會商李鶴章等先將  
援賊擊退再行設法攻城惟分布太廣兵力過

單必須穩慎籌辦以固全局

李鴻章又奏言忠逆自大橋角敗退後糾集大股賊匪八九萬衆船千餘隻停泊運河口令各僞王由望亭后宅滾營前進圖竄常熟抄我後路九月初四日郭松林督率馬步剿賊於茅塘奮勇衝殺擒斬多名賊始退回滕嗣武張樹珊等亦於是日擊退蘇舍橋一帶之賊初八日李



鶴章親督各軍進至后宅忠逆率黨出拒我軍  
排放槍礮直奪其卡滕嗣武合力追逐賊遁入  
營其街北一營最堅街西賊營無數皆倚河爲  
壘滕嗣武張樹珊先攻街北賊營賊伏不動營  
後賊衆數萬突出猛撲我軍轉至街西大橋整  
隊鏖戰斃賊數千名李鶴章督催橋東大隊踰  
街衝突賊始敗退李鶴章遂留滕嗣武三營併

紮大橋角令張樹珊帶隊同張涇橋老營豫備  
夾擊初九十一等日郭松林率隊屢敗賊於紅  
山等處十三日忠逆率大股由后宅竄撲安鎮  
郭松林復擊走之擒斬頗衆江陰西南焦塾芙  
蓉圩等處爲僞護王賊衆踞守日在江陰城西  
擄掠並以斜橋三河口築壘十餘座劉銘傳進  
駐青陽於九月初二日先攻芙蓉圩之賊破其

外卡搭橋渡河圩賊萬餘分路來撲劉銘傳令  
彭楚文守護浮橋劉盛藻等從兩邊圩埂迎擊  
劉東堂等由圩心迎擊水深數尺各勇解衣酣  
戰賊遂大敗護逆以木板浮河逸去斬僞天將  
馬逆一名擒僞官五百餘人芙蓉圩等處卡館  
一律掃清初三初五等日唐殿魁等進剿焦塾  
之賊劉銘傳自率五營繞攻焦塾之後劉盛藻

奪石巖山河口賊卡二處張桂芳敗西路援賊  
各軍分攻河東南北三路賊營擒殺踞賊二千  
餘名立將焦塾賊營踏毀乘勝攻踏三河口賊  
營十餘座十一二等日各營迎勦侍逆大股又  
破賊衆於西高山聯營進桀侍逆退踞高橋臣  
查思侍各逆全勢萃於西路力援無錫以護蘇  
州援賊一日不清則蘇錫不能進取護逆一股

受創已深侍逆亦爲劉銘傳等擊敗退踞高橋  
其鋒稍挫我軍可以專意併圖忠逆臣現飭李  
鶴章與劉銘傳郭松林張樹聲等堅紮營濠以  
固後路抽派精銳直偪賊壘合力進攻總須擊  
退忠逆錫蘇各城乃可漸圖陣亡守備楊人傑  
把總但成喜應請

飭部從優議卹奏入

上命議政王軍機大臣傳諭李鴻章曰現在蘇州婁門葑門盤門各路俱斷嘉湖援賊復受大創事機甚爲順手著李鴻章卽飭五龍橋寶帶橋長生橋水陸各軍嚴密扼紮毋致爲賊所乘惟忠逆糾合各僞王大股萃於西路力援無錫以護蘇城援賊一日不清則蘇錫勢難進取現在護逆受創於芙蓉圩侍逆亦爲劉銘傳等逐退高橋其鋒已挫卽

著飭令各軍合力併圖忠逆先將該逆大股痛加  
勦戮再行設法攻城惟值此蘇賊窮蹙各軍屢勝  
之餘尤當穩紮穩進不可稍有挫失陣亡守備楊  
人傑把總但成喜均著交部從優議卹

初六日己卯曾國藩奏言本年七月下旬太平逆

會古澧賢石埭逆會賴汝鴻等乘青陽被圍時  
各糾大股蓄意犯涇古逆一股踞聚茂林潘村

等處甯國守將劉松山督隊於八月初八日馳抵涇城與守涇之易開俊會商先擊章家渡之賊以便徐圖茂林初九日劉松山易開俊令章瑞璿陳名鈺等分段前進道出丁家渡斬卡賊數人餘賊退入章家渡易開俊劉松山等催軍猛擊斬馘頗多突有花旗一股自金村來援章家渡敗賊回戈轉鬪陳青雲率隊斜刺而入章



合才易德麟併力乘之王華國等從叢箐中抄  
出賊後賊敗竄水南都易開俊謀之劉松山於  
十一日馳赴茂林至則鳳村李村之賊聞風悉  
遁乃以六旗攻茂林四壘以二旗攻潘村三壘  
茂林之賊踰橋來拒鄧光武等偪賊退至村口  
章合才率衆追之壘賊千餘來援易德麟騎隊  
橫出邀截章合才王華國等從村後包抄賊隊

遂亂壘賊亦潰其攻中二壘者爲歐陽廷易致  
中見古會出巢督戰歐陽廷以一旗掠陣易致  
中昇巨礮轟之古會負創返奔易開俊亦率勁  
隊馳至施放火器燄賊壘二座潘村三壘亦爲  
陳青雲張恆舟所破於是合軍追逐又踏二壘  
於潘村之後餘黨向太平老巢而遁至甯國北  
路羣賊嘯聚聞劉松山赴涇甯郡空虛謀襲郡

城十四日劉松山引軍馳回令各門繕修守具  
十七日諜報賊至油榨溝將以詰朝來襲劉松  
山令章瑞璿等夜出南門繞過敬亭山擇險設  
伏又令張聲壯易德麟等在西城嚴陣以待天  
甫向曙賊數千人沿河擁至踰濠競進劉松山  
令張聲壯陳世隆等分勦西南兩門之賊自督  
胡文高章合才等自北門出攻賊不及備死於

濠下者甚多驅賊至北門銜張聲壯易德麟等  
適從西門追來遂將北門兩股一併擊退賊之  
在南門者將由敬亭山折竄而北不料伏軍橫  
斷歸路賊乃東奔廟埠劉松山又遣章合才等  
前後夾擊斬馘無算賊走濱河一帶爭舟舟覆  
多溺水者劉松山又於二十二日率張玉迪章  
合才等迎賊於廟埠賊不戰而退楊玉迪進軍

油榨溝奮擊帶傷突陣賊循河下竄維時涇縣  
之水南都尙有踞匪麕聚丁塘茶坑一帶二十  
四日易開俊密諭各營乘夜出奇雕勦比曉進  
圍四頁村執先鋒賊數百名斬之丁塘等處賊  
卡均被攻破賊由雲嶺西竄水南都旋踞平垣  
九月初三日易開俊軍次平垣五里許令蕭章  
開等分路進擊賊悉踰崖而遁初七日晏公塘

零匪與壩頭曹溪各股併退風坑易開俊於初  
八日出隊琴溪橋下設伏誘賊賊自風坑來撲  
曹義勝等接戰佯卻引入伏中歐陽廷等突出  
包圍亂刃交錯賊不能支敗往甯國縣而去臣  
查甯國涇縣地居皖南數屬之中自上年易開  
俊劉松山等統軍分駐兩城屢卻大敵復能馳  
驅援應保全大局把總鄧光武外委雷國英力

戰陣亡均請

飭部從優議卹

同日左宗棠奏臣於富陽克復後卽飭康國  
器魏喻義與楚軍各營由富陽圍攻餘杭蔣益  
澧令劉清亮助之而自駐留下地方居中調遣  
兩路疊獲勝仗攻破城外賊壘賊卡數十處事  
機頗爲順利惟賊勢尙熾自杭城至餘杭連營

數十里希圖抗拒臣本擬進駐富陽適得徽州各路警報太平石埭之賊紛紛過嶺犯及歙休黟祁各境劉典王開琳等各率所部防剿均獲勝仗賊雖敗遁歸巢另股時由績溪歙縣各境踰嶺紛擾又探皖北之賊圖越浙境以援杭州餘杭股數甚多嚴州防務喫緊臣未可遽離此閒故暫緩富陽之行相機布置現聞青陽解圍



逆賊有趨浙境之勢已分遣各營防守新城分水富陽並飭劉典暫緩出嶺相機截擊臣督親兵三營仍駐嚴州以期兼顧臣營中將士及地方印委各員多染疫物故者移紮新城分水各營亦然節交霜降疫氣仍未衰減殊爲憂煩所有各路獲勝詳細情形容卽專摺奏報均奏入上命議政王軍機大臣傳諭曾國藩左宗棠曰逆酋

古澹蕢等糾合大股匪徒圖犯涇縣經劉松山督  
隊往援會同易開俊合力迎擊連破茂林潘村等  
處賊壘嗣甯國北路之賊謀襲郡城劉松山聞信  
馳回開門出擊賊股相率敗遁該鎮將等往來策  
應屢卻大敵勦辦頗爲出力惟石埭太平尙爲賊  
踞皖南羣匪蟻聚必須由上游各城埽蕩而下著  
曾國藩嚴飭江忠義李榕等激勵諸軍鼓勇前進

迅將石太一帶賊壘悉數削平與易開俊劉松山等廓清皖南全境俾金陵之師無後顧之患方爲妥善徽浙軍務互相表裏徽郡餘孽未清歛休駭祁路路可通難保不乘隙竄越浙境左宗棠自應仍駐嚴州相機布置著卽飭令劉典王開琳等嚴防徽郡各屬毋任該匪闖入其進逼杭城餘杭之師並著密飭蔣益澧分飭所部穩守營壘不可輕

率前進致爲該匪所乘節交霜降何以該省疫氣  
尙未消除據奏營中將士及地方印委各員物故  
者多軍士如此百姓可知覽奏曷勝憫惻該督務  
當宣布朝廷德意善爲撫綏感召

天和潛消疹癘以期軍務日有起色曾國藩奏請將陣  
亡把總鄧光武外委雷國英優卹等語均著照所  
請交部從優議卹

曾國藩又奏冒遵查已革水師總兵黃彬叅款  
臣訊據供詞細覈原叅各款水師將佐實未  
在劉河打仗巡撫衙門並無周姓控案卽沿江  
卡釐旣歸臺局經理亦無侵吞實據惟在船宴  
客索取米帳兩事案關通賊情節較重反覆推  
勘派員密訪均未查有確證然於游匪潛濟賊  
米未能覺察恐其部卒亦不免參錯其中以致

議沸騰實非尋常失察可比自應從重比例擬  
結查例開姦徒偷運米穀接濟奸匪者較失察  
各官照例議處此案已革黃巖鎮總兵黃彬雖  
訊無通賊重情乃以幫辦軍務總統水師大員  
既不能攻克城池肅清江面又不能禁遏奸匪  
接濟賊糧科以失察議處之例殊覺過於輕縱  
業經革職在先仍擬請

旨將黃彬發軍臺效力贖罪以肅軍政奏入

上諭內閣曰已革總兵黃彬被衆各情雖經曾國藩  
查無實據惟以幫辦軍務總統水師大員旣不能  
攻克城池肅清江面又不能禁遏奸匪接濟賊糧  
實非尋常失察可比黃彬著卽發往軍臺效力贖  
罪

初七日

庚辰

雲貴總督勞崇光署貴州巡撫張亮

基奏言據署松桃同知劉侶鶴等稟稱髮逆李  
宰輔等被婺川兵勇擊退尙存五六千人逃往  
四川彭水縣境七月十三日竄至酉陽州屬龍  
潭地方旋竄秀山縣境逼近松桃劉侶鶴等厚  
集兵練扼防該匪由閒道越嶺分股竄入廳境  
劉侶鶴等督率兵勇向長興堡併力攻擊斃匪  
數百名賊遂奔潰我軍跟蹤追剿復斃匪三四



百名生擒五十餘名正法追至湖南邊境弭落  
地方始行收隊現飭該文武仍派兵勇扼守各  
隘以防回竄奏入

上命議政王軍機大臣傳諭勞崇光張亮基駱秉章  
惲世臨曰髮逆李宰輔等經婺川兵勇擊退後逃  
往四川彭水縣境復由酉秀等處竄入黔省松桃  
廳經同知劉侶鶴等督率兵勇擊退追至湖南邊

境弭落地方此股逆匪往來川黔楚南邊境奔突  
靡常非三省合剿不能杜其紛竄著勞崇光張亮  
基駱秉章惲世臨各派兵勇合力攻剿務將該匪  
四面兜圍迅速殄滅不得稍分畛域致令乘隙奔  
逃復形滋蔓

初八日 辛巳 張凱嵩奏言前探石逆餘黨李幅猷

由粵竄楚當咨代辦提督蕭榮芳調軍擇要堵

截一面嚴檄地方文武集練嚴防八月二十四日該逆已由楚省之青林界竄入粵西龍勝廳境通判曹德炘率領團練會同代理義甯協副將扼駐防守二十七日該匪分股數千翻山繞出防兵之後竄擾都乃地方大肆焚掠在籍總兵胡元昌自督鄉團截擊奮勇衝鋒手刃數賊旋因賊衆勇少力盡被害該匪遂屯踞仰寨沂

潭等處二十八九等日曹德所調圍攻賊疊有斬擒賊匪沿河逃遁署義甯縣知縣汪元崇等帶練跟追殺賊多名賊由馬蹏汎芙蓉塘竄往湖南城步縣境其後隊之賊爲兵練所遏退竄斗江關入懷遠縣境臣以懷遠路達潯梧亟應制其奔竄派副將黃仲慶帶勇千名由省堵剿並以城步與興安全州接壤北路宜防復派都

司唐應瑞募勇五百名以資策應旋探前竄城步之賊於九月初五日由興安僻徑突至界首圖擾省城北路署興安縣知縣錫敬齊團截勦該匪奔往灌陽縣界署知縣趙準等設伏以待初八日敗之於古嶺頭又敗之於立安寨殲擒甚衆都司唐應瑞帶勇趕至全州知州葉葆元督勇合勦斃匪四百餘名生擒十二名初九日

追至鋪門該匪回旗轉鬪我軍奮力酣戰匪遂  
遁往文村沿途擊斃三百餘名生擒九名該匪  
由烏水村直出道州地界其斗江一股志在由  
柳竄潯擾及融縣境內千總李德全師船已抵  
融縣遊擊孔憲隆等帶軍將次抵境太平府知  
府鳳貴亦會督地方文武分扼水陸要路九月  
初三日賊復由斗江折竄懷遠初四初五等日

疊爲洞練擊敗竄至程陽冠洞平鋪等處疊被  
團練擊退斃匪不可勝計初九日各團約會圍  
攻斬悍賊百餘名生擒十餘名該逆逃往茶溪  
水團一帶其地爲黔楚粵三省交界臣查此起  
匪徒入粵以後被擊分竄逆首李幅猷究在何  
處犯供互異尙難指實近聞北竄之匪復爲道  
州兵勇擊敗臣已嚴飭全州等處文武加意嚴

防黃仲慶孔憲隆等兩軍計抵懷遠已飭令迅  
速歸蹕將屯踞茶溪水圍之賊實力圍剿並檄  
右江柳州各道府督屬集團併力殲除仍咨湖  
南貴州兩省兜剿以期全股蕩平在籍提督銜  
總兵胡元昌督團力戰被執遇害仰懇

天恩飭部從優議卹龍勝通判曹德旻代理義甯協  
副將思恩營遊擊甘應經臣札令妥籌捍衛乃



祇知設防不卽迎剿致賊由閒道竄擾總兵大員被害實屬咎無可辭應請

旨將曹德所甘應二員一併革職留營效力以示懲儆奏入

上命議政王軍機大臣傳諭毛鴻賓晏端書郭嵩燾張亮基惲世臨張凱嵩曰張凱嵩奏髮逆李幅猷股匪由楚省之青林界竄入粵西龍勝廳境分股

擾及都乃屯踞仰寨沂潭等處經兵團擊退折竄  
湖南城步縣境後隊之賊退至斗江關入懷遠縣  
境內城步之賊復由興安僻徑突至界首圖擾粵  
西省城北路經勇練截殺多名退至湖南道州地  
界斗江一股擾及融縣復被紳團狗練到處截擊  
折回懷遠此股逆匪由楚入粵復由粵入楚分合  
無常奔突靡定必須會合兜剿方可杜其紛竄現

在分擾道州一股雖在楚南境內惟該處界連兩  
粵往返奔逃勢甚便捷著毛鴻賓晏端書郭嵩燾  
張凱嵩惲世臨分飭兵勇嚴扼分界要隘並令三  
省將弁聯絡聲勢前截後追以期迅掃逆氛惲世  
臨亦宜振刷精神嚴督在事文武將道州股匪就  
地殲除不得以驅逐出境卽爲了事懷遠地方界  
連黔粵楚三省著勞崇光張亮基惲世臨派撥兵

勇分扼險要勿令竄入並著張凱嵩督飭兵練將  
茶溪水圍一帶之賊實力剿洗勿任他竄張凱嵩  
摺內所陳鋪門等處地方究係何州縣所屬並未  
敘明嗣後務當詳細聲敘以清眉目

上諭內閣曰張凱嵩奏李幅猷股匪竄入廣西龍勝  
廳境分股由斗江擾及融縣經該處師船及各地  
方兵團剿練分投兜剿陣斬悍賊百餘名該逆向

茶溪水團一帶遁走在籍提督銜總兵胡元昌親督鄉團在龍勝廳都乃地方遇賊接仗因衆寡不敵被執遇害深堪憫惻著交部從優議卹龍勝通判曹德炘代理義甯協副將思恩營遊擊甘應於賊氛入境未能嚴密設防致匪蹤由閒道闌入實屬疏於布置咎無可辭均著卽行革職仍留營效力以觀後效

十三日丙戌駱秉章劉蓉奏言查漢南援軍失利

時臣劉蓉榮由成都起程臣駱秉章當卽飛咨

詳查失利實情以憑會辦臣劉蓉於八月二十

七日行抵巴州據探援軍於十六日接仗後十

九日提督蕭慶高率中軍攻油房街何勝必率

右軍攻中所營陝安道張由庚率所部嚮導營

循左路漢山旁抄中所營總兵朱桂秋率桂宇

營由右路抄油房街知府易佩紳率果健營攻  
右路李家街甫近賊卡油房街中所營之賊如  
潮湧至我軍施放槍礮轟擊斃賊千餘賊陣已  
亂蕭慶高何勝必長驅直進連拔梅花樁數重  
距賊巢甚近不意襄沔之賊由新集左路抄入  
北岸之賊復由右路抄來嚮導一軍先潰桂健  
兩軍亦敗該逆復出馬隊數千四而包裹官軍

血戰逾時始獲潰圍而出其時兩路包抄之賊距營不遠我軍分路抵敵斃賊數百薄暮收隊是夜賊匪多未歸巢潛伏四面山澗桂健兩軍退紮法慈院青石關等處賊知我軍勢孤遂於次日黎明由右路繞出各營之後四面合圍我軍力戰傷亡甚多至午後始突圍回營山後之賊已由後營放火於是湘果中右及嚮導等軍



盡棄輜重退至青石關一帶先是臣劉蓉奉

命督師卽慮各軍輕進致敗曾經檄飭諸軍偏營漢

郊堅壁勿戰俟臣到營後規度進剿乃各軍尙

未接到前檄因見漢郡城圍緊迫急欲一戰解

圍漢中地勢平衍賊馬便於馳騁我軍皆係步

隊又值久雨泥深不利衝擊賊衆我寡以致挫

敗漢中城固相繼失守臣駱秉章馳檄川東添

調勁旅臣劉蓉派員回楚增募新兵暫駐巴州  
趕辦軍裝俟所調果後九營到齊卽行統率前  
進查十九日之戰陝安道張由庚所部先潰總  
兵朱桂秋知府易佩紳當事勢危急之時不能  
力戰實有應得之咎該三員均應請

旨卽行革職惟張山庚平日尙能撫馭士卒此次實  
因傷病未能督陣情尙可原易佩紳在漢中軍

營年餘尙能竭力支持合無仰懇

天恩俯准將張由庚革職留任並准易佩紳留營效力以贖前愆候補提督蕭慶高何勝必進攻過銳亦屬未能持重應請

旨一併摘去翎頂以示薄懲至各營官或有臨陣退縮者應俟詳細查明分別懲辦陣亡之總兵賀蘭桂蕭慶泗何玉林解洪德副將李凱章參將

徐祥泰黃星堂遊擊黎松鶴守備蕭積蕊千總  
張大興升用同知蕭積玉血戰捐軀均請

旨交部從優議卹

劉蓉又奏言八月二十日援軍敗退後僞啟王  
由南岸回踞漢郡東關乘夜越城放火城遂不  
守旋據代理西鄉縣知縣陳爾芾稟報郡城失  
後南鄭縣知縣周蕃壽殉難守城將弁兵勇四

散潰逃該逆於二十四日撲陷城固縣城溯自  
羣賊竄擾漢中屢墮

聖慮始派李桓督辦適以病辭繼派李雲麟前征忽  
遭母喪展轉耽誤賊勢愈張迨臣奉

命督師蒼黃就道方冀仰仗

威德立解倒懸不謂臣未出疆聲威先挫遂使名城  
瓦裂逆餒臨張推其所以致敗之由一因孤軍

無援誤於輕進一因漢中無險可扼以步卒當  
騎隊用我所短攻賊所長一因轉運不繼戰士  
飢疲有此三者遂處必敗之勢臣與督臣駱秉  
章早慮及之故於三四月閒奏派張由庚朱桂  
秋率師赴援復檄使暫紮邊境俟鄂師西上會  
合夾擊至石逆就俘蜀境稍靖又添派蕭慶高  
何勝必兩軍戒以勿得輕進冀俟鄂軍到後仍

爲三省會勦之謀迫聞漢中城圍孔亟而李雲  
麟假期已滿杳無來音不得已檄催前進亦以  
楚軍久著聲威無妨冒險一出不料軍威挫損  
賊勢猖狂現惟避短用長仍圖三路進勦庶幾  
轉敗爲勝惟餉源乏竭精銳銷亡比接探報褒  
沔西鄉一帶賊氛密布並據毛震壽稟稱八月  
初九日申旗髮匪竄近略陽代理知縣劉希寬

督團禦於開道嶺被賊兩路夾撲力竭陣亡並  
聞徽成階文均有賊蹤竄越附近興漢州縣亦  
皆可虞近日漢郡賊衆四出向通江南江毗連  
之龍池場一帶擄掠意圖窺伺川疆臣現督飭  
諸將收集殘卒分隘嚴防並檄毛震壽將兩城  
潰卒妥爲資遣易佩紳所部八營亦飭大加裁  
汰一面函催李雲麟迅率所部水陸各軍由鄖



陽徑趨西鄉會商勦辦一面派員回楚募勇三  
四千名練成勁旅惟由蜀抵湘往返八九千里  
計須臘底取齊且聞苗逆擾及裕州鄂邊戒嚴  
李雲麟能否會師西嚮尙難豫定臣擬俟所調  
果後九營到後親統進駐青石關激勸諸軍先  
固川疆門戶相機雕勦並檄署漢中府知府楊  
光澍設法採運米糧以供軍食伏乞

皇上迅催李雲麟裹帶行糧泝流西上以符三省會  
剿之議現值中旗髮逆竄近階文周達武曾紀  
鳳兩軍祇可嚴防川界褻汙一路尙屬無兵可  
籌將來臣與李雲麟分道犄角相距不宜太遠  
一切進止機宜尙須熟籌如李雲麟回顧楚疆  
不能來陝會剿則臣不宜孤軍獨進致蹈前日  
覆轍惟當咨商督臣酌撥四五千分防青石

關而自率萬餘人改由廣元趨甯羌以圖褒沔  
庶節節痛勦尙有可圖且係通驛大路米糧便  
於轉輸督臣駱秉章忠誠懇至於籌餉事宜必  
能竭力措辦惟臣身任封圻於陝省事宜責無  
旁貸而道路梗阻聲息苦不相聞伏乞

皇上飭下署撫臣張集馨於一切應辦要務實心整  
頓勿存五日京兆之見或司庫稍有存款仍卽

撥濟臣軍荊州將軍多隆阿兵力尙厚或更分  
撥馬隊千餘名駐紮留壩以遏該逆北竄之路  
亦可少戢兇鋒俟臣趨襄沔約會夾擊實於通  
省機局有裨署南鄭縣知縣周蕃壽督勇守城  
臨難不苟應請

特恩優加褒卹代理略陽縣知縣劉希寬禦賊捐軀  
並請

旨交部照例賜卹其餘文武各官容俟查明下落再行據實具奏

劉蓉又奏言查江西袁州協副將唐星照前在川中屢著戰績該副將籍隸衡陽經臣札飭就本籍衡湘一帶募勇二千名分作四營派員統帶來營以備調遣惟係實缺人員應請

旨飭下江西撫臣沈葆楨湖南撫臣惲世臨催令趕

緊募選戍軍迅速起程所需槍礮軍裝各項應  
請由湖南軍需局撥發該副將承領以利軍行  
而資攻勦奏入

上命議政王軍機大臣傳諭官文多隆阿駱秉章熙  
麟嚴樹森劉蓉李雲麟張集馨曰援陝各軍輕進  
失利以致漢中郡縣失陷該員弁等獲咎甚重前  
據張集馨陳奏各情業經降旨分別革職留營以

觀後效矣陝南逆燄臨張據劉蓉奏稱中旗髮逆竄近略陽知縣劉希寬禦賊陣亡並徽成階文均有賊蹤竄越附近興漢州縣亦甚可危近日賊衆四出時向通江南江毗連之龍池場等處擄糧裹人大有窺伺川疆之意劉蓉現在督飭諸將收集殘兵嚴防各隘並檄毛震壽將兩城潰卒妥爲資遣易佩紳所部亦飭大加裁汰一面派員回楚募

勇三四千名練成勁旅擬俟果後九營到齊進駐  
青石關先固川省門戶相機雕剿或孤軍未能獨  
進則改由廣元趨甯羌以圖褒沔所籌均尙周妥  
第添募之勇到營須在臘月所調之副將唐星照  
又遠在江西且回湘募勇亦恐緩不濟急而毛震  
壽又係革職留營差委之員尤恐威望不著呼應  
不靈設該匪乘機肆逞則陝甘川楚邊境在在可



虞劉蓉身任封圻責無旁貸著卽趕緊部署就現有兵力或分防青石關徑由甯羌進圖褒沔俾該匪偵知蜀兵將至有所顧忌不敢紛竄爲患徐圖相機前進方爲妥善留壩廳爲入西安要路劉蓉勢難兼顧並著多隆阿酌度情形如兵力有餘卽抽撥馬隊千餘名駐紮留壩以遏該匪北竄之路劉蓉到任尙需時日張集馨署理撫篆斷不可存

五日京兆之見所有應辦要務必須實心整頓其  
漢南一帶應行防剿之處並著隨時與多隆阿熟  
商妥辦毋誤事機劉蓉所統各軍指日抵陝所需  
餉項如司庫稍有存款張集馨仍當力籌撥濟李  
雲麟於九月初旬行抵鄖西之上津堡節經諭令  
該京卿馳赴興安扼賊東竄計已行抵興郡該京  
卿所部係特派援陝之師著俟布置稍定卽約會

劉蓉分路進剿以收夾擊之效

上又命議政王軍機大臣傳諭沈葆楨惲世臨曰陝南髮逆自竄陷漢中後蔓延日甚川陝交界處所一片賊氛劉蓉自川援陝前敵各軍挫衄非再練精銳之師不足以新壁壘副將唐星照旣據劉蓉稱其堪勝統將之任卽著沈葆楨飭令迅回本籍於衡湘一帶招募精壯勇丁二千名分作四營派

員統帶前赴劉蓉軍營以資調遣唐星照回湘後  
著憚世臨催令選募成軍趕緊起程所需槍礮軍  
裝各項著卽由湖南撥發交該副將承領以利軍  
行

上諭內閣曰駱秉章劉蓉奏確查援陝各軍先勝後  
挫實在情形一摺除道員張由庚等業經降旨分  
別革職懲辦外所有接仗陣亡之總兵賀蘭桂蕭

慶泗何玉林解洪德副將李凱章參將徐祥泰黃  
星堂遊擊黎松鶴守備蕭積蕊千總張大興同知  
蕭積玉等均著交部從優議卹以慰忠魂

上又諭內閣曰陝西署南鄭縣知縣周蕃壽督勇守  
城殫竭心力臨難之際大節凜然著交部從優議  
卹代理略陽縣知縣劉希寬禦賊於閭道嶺力竭  
陣亡殊堪矜憫著交部照例議卹